



Број/Број: 03-/4-50-1-10-11-7/8
Сарајево/Сарајево: 25. 4. 2008. године

Z A P I S N I K

11. sjednice Zajedničke komisije za evropske integracije Parlamentarne skupštine BiH, održane 22. 4. 2008.

Sjednica je počela u 11 sati.

Predsjedavajući Halid Genjac sazvaо je 11. sjednicu Zajedničke komisije za evropske integracije Parlamentarne skupštine BiH.

Sjednici su prisustvovali članovi Zajedničke komisije: Halid Genjac, Drago Ljubičić, Ivo Miro Jović, Šemsudin Mehmedović, Rudo Vidović, Zoran Koprivica, Azra Hadžiahmetović, Milica Marković i Selim Bešliagić, te Vladana Lučić, stručni saradnik u Zajedničkoj komisiji. Alma Čolo, Branko Dokić i Hilmo Neimarlija opravdali su odsustvo.

Sjednicom je predsjedavaо predsjedavajući Zajedničke komisije Halid Genjac.

DNEVNI RED

1. Usvajanje zapisnika 9. i 10. sjednice Komisije;
2. Fondovi Evropske unije koji su na raspolaganju Bosni i Hercegovini, njihove karakteristike i načini korištenja;
Uvodno izlaganje: Zara Halilović, Direkcija za evropske integracije;
3. Tekuća pitanja
- posjeta Odboru za evropske integracije Hrvatskog sabora.

Ad. 1. Usvajanje zapisnika 9. i 10. sjednice Komisije

Nakon što je jednoglasno usvojen dnevni red, prisutni članovi jednoglasno su usvojili zapisnike 9. i 10. sjednice Komisije, koji su im ranije dostavljeni.

Ad. 2. Fondovi Evropske unije koji su na raspolaganju Bosni i Hercegovini, njihove karakteristike i načini korištenja:

Uvodno izlaganje: Zara Halilović, vršilac dužnosti direktora za koordinaciju pomoći EU u Direkciji za evropske integracije

Zara Halilović, vršilac dužnosti direktora za koordinaciju pomoći EU u Direkciji za evropske integracije, na početku svog izlaganja zahvalila je Zajedničkoj komisiji na pozivu da članovima Komisije predstavi fondove Evropske unije koji su na raspolaganju Bosni i Hercegovini.

Instrument prepristupne pomoći (IPA) je novi instrument koji Evropska unija primjenjuje od 2007. godine prema zemljama Zapadnog Balkana i Turskoj.

Uz pomoć ovih fondova, cjelokupna prepristupna pomoć stavlja se u jedinstveni okvir s unificiranom regulativom i za zemlje kandidate (Hrvatska, Turska, Makedonija) i za zemlje potencijalne kandidate (Bosna i Hercegovina, Srbija, Crna Gora i Albanija).

Osnovni ciljevi programa IPA su pomoć državama kandidatima i državama potencijalnim kandidatima za usklađivanje nacionalnog zakonodavstva i provođenje pravne tečevine EU i priprema za korištenje kohezionih fondova.

Fondovi programa IPA isključivo se koriste za potrebe procesa evropskih integracija i isključivo prema pravilima i procedurama Evropske unije. Aplikacije se predaju Delegaciji Evropske komisije u zemlji, a putem uspostavljene nacionalne strukture.

IPA se sastoji od pet komponenti: 1) pomoć u tranziciji i izgradnji institucija 2) prekogranična saradnja 3) regionalni razvoj 4) razvoj ljudskih potencijala i 5) ruralni razvoj.

Ona je zatim govorila o prve dvije komponente ovog programa koje su na raspolaganju Bosni i Hercegovini, kao zemlji potencijalnom kandidatu.

Komponenta 1) Pomoć u tranziciji i izgradnji institucija obuhvata sve aktivnosti koje su povezane s *aquis communautaire* (zakonodavstvo EU), sa izgradnjom administrativnih kapaciteta, kao i podrškom mjerama saradnje koje nisu obuhvaćene drugim komponentama. Projektni prijedlozi u okviru ove komponente pripremaju se na osnovu prioriteta iz Višegodišnjeg indikativnog planskog dokumenta, a njihova realizacija provodi se na osnovu utvrđenih procedura Evropske komisije. Korisnici ove komponente su organi državne uprave, javna preduzeća, u manjem obimu nevladine organizacije, te ostale neprofitne organizacije i poslovni subjekti.

Komponenta 2) Prekogranična saradnja podržava sve aktivnosti koje su u vezi s regionalnom i prekograničnom saradnjom sa zemljama članicama, te zemljama korisnicima programa IPA. Ove aktivnosti zasnivaju se na višegodišnjim programima

prekogranične saradnje i realiziraju se prvenstveno kroz pozive za podnošenje projektnih prijedloga.

Potencijalni korisnici ove komponente, zavisno od prioriteta i mjera datog programa, mogu biti jedinice regionalne i lokalne uprave, nevladine organizacije, istraživačke i razvojne institucije, privredne komore itd. Općinski nivoi vlasti kao i mala i srednja preduzeća mogu aplicirati ukoliko imaju partnera (pogodnu instituciju) s druge strane granice i ukoliko projekat nije profitabilan. Za Bosnu i Hercegovinu je u periodu od 2007. do 2010. godine u okviru programa IPA (komponente 1) i 2)) osiguran iznos od ukupno 332 miliona eura.

Za ukupnu koordinaciju i upravljanje programima IPA u BiH zadužena je Direkcija za evropske integracije, odnosno Ured nacionalnog koordinatora za IPA. Tijela nadležna za realizaciju procesa programiranja, te identifikacije i formulacije projektnih ideja su: Komitet za pripremu projekata, koji se sastoji od voditelja programa, projekt-menadžera iz Delegacije Evropske komisije i projekt-menadžera iz DEI-a i Komitet za upravljanje programima, koji se sastoji od predstavnika Evropske komisije i predstavnika DEI-ja. Oni koordiniraju i usaglašavaju sva sporna pitanja, dolazeći tako do jasno identificiranih prioriteta. Sredstva iz IPA-e raspoređuju se isključivo u skladu s Višegodišnjim indikativnim planskim dokumentom. Ciljevi i rezultati navedeni u ovom dokumentu koriste se kao polazište za odabir i identifikaciju budućih projektnih prijedloga, koji se onda transformiraju u projektne ideje. Nacionalni koordinatori rukovodi i nadzire procese strateškog programiranja, identifikacije potreba i prioriteta koristeći mrežu voditelja programa u državnim institucijama.

Direkcija za evropske integracije i voditelji programa i projekta, uključeni u realizaciju aktivnosti u vezi s programiranjem IPA 2008 – komponenta 1), obavljaju izuzetno složene, i od najveće važnosti za zemlju, zadatke i obaveze. Oni analiziraju potrebu zemlje, rade na usklađivanju s dokumentima EU i domaćim strateškim dokumentima, identifikaciji prioriteta u okviru potreba, te na kreiranju odgovarajuće projektne intervencije korištenjem posebnih znanja i vještina u skladu s propisima i metodologijom EU za podršku Bosni i Hercegovini u ispunjavanju strateških ciljeva i prioriteta koji se odnose na proces evropskog integriranja.

Na kraju izlaganja Zara Halilović predstavila je Sektor za koordinaciju pomoći EU Direkcije za evropske integracije i ukazala na nedostatke u kadrovskim potencijalima i prostornim kapacitetima, u kontekstu složenosti posla koji obavlja DEI, a naročito Sektor za koordinaciju EU pomoći.

U raspravi, koja je uslijedila nakon izlaganja direktora za koordinaciju pomoći EU, učestvovali su: Halid Genjac, Azra Hadžiahmetović, Zoran Koprivica i Selim Bešliagić.

Halid Genjac je, između ostalog, rekao da je veoma bitno da se ovlada procedurama korištenja fondova IPA-e, s obzirom da je jedna od uloga Komisije i nadziranje korištenja ovih fondova. Njega je zanimalo kako se aplicira za fondove IPA-e, ko vrši selekciju i kako su u Briselu ocijenjeni projekti koje je Bosna i Hercegovina ranije kandidirala.

Komentirajući probleme u vezi s kadrovskim potencijalima i prostornim kapacitetima s kojim se susreće Direkcija za evropske integracije, on je predložio da Komisija inicira rješavanje ovih problema kako bi Direkcija bila osposobljena da odgovori ozbiljnim

izazovima koji slijede u narednoj fazi nakon potpisivanja Sporazuma o stabilizaciji i pridruživanju.

Azra Hadžiahmetović ukazala je na nedostatak mehanizama da se fondovi IPA-e približe potencijalnim korisnicima. Nju je zanimalo koji su najaktuelniji problemi s kojima se susreće DEI u realizaciji ovih projekata, koji fondovi su trenutno na raspolaganju Bosni i Hercegovini i pod kojim uslovima se oni mogu koristiti.

Predložila je da se Direkcija za evropske integracije obrati Komisiji s listom prioriternih problema, dodajući da će Komisija inicirati da se oni što hitnije riješe.

Ad. 3. Tekuća pitanja:

- posjeta Odboru za evropske integracije Hrvatskog sabora

Dogovorena je realizacija posjete Hrvatskom saboru i Odboru za evropske integracije Hrvatskog sabora, u organizaciji OSCE-a – Program jačanja zakonodavne vlasti, od 11. do 13. maja 2008. Utvrđen je sastav delegacije: Halid Genjac, Ivo Miro Jović, Azra Hadžiahmetović, Milica Marković, Šemsudin Mehmedović, Alma Čolo, Branko Dokić, Rudo Vidović, Zoran Koprivica i Hilmo Neimarlija.

Sjednica je završena u 12,40 sati.

Predsjedavajući
Zajedničke komisije
Halid Genjac